

Bruno Koolman:

Paranda di Dande tabata dura 3 dia of mas

ORANJESTAD - Manera ta conoci, e di 36 Festival di Dande dia 26 di December 2009 ta wordo dedica na e legendario cantante y musico Bruno Koolman y acordeonista Tico Oduber.

Sr. Bruno Koolman no ta un cantante di dande, pero e ta un musico cu talento di nacimiento cu a desaroya su mes den musica tipico Arubano.

Un persona aprecia den su famia pero tambe na Savaneta y henter Aruba ya cu el a core su paranda di dande den tur skina di Aruba y tin hopi amigo den tur bario.

Bruno koolman a nace dia 6 di October 1925 na Savaneta y cu edad di 33 aña el a casa cu Maria Frelida Dijkhoff di Paradera, un matrimonio cu a wordo bendiciona cu 6 yiu 2 muher y 4 homber y varios nieto y nieta.

Prome cu Bruno a casa e tabata tin varios mucha muher pero Maria tabata e dichoso cu Bruno a casa cune y forma un bunita hogar.

Como regalo el a haya un sinfonia di boca di su ruman Cadan, tempo cu e tabata tin 12 aña. El a aprecia e sinfonia aki



masha hopi mes y a cuminsa supla te ora el a saca compas di melodia y asina a siña toca poco poco. Su prome cantica tabata e tradicional aguinaldo y despues dande.

Bruno ta sobrino di e cantante di dande di tur tempo Yendi Koolman. El a siña toca varios pieza di Minguelito Willems cu tabata un bon tocador di violon.

Bruno y su grupo musical di fin di aña tabata pasa paranda di cas pa cas cu aguinaldo, Bispo di Pasco, esta Noche Buena. Asina cu fin di aña ta yegando nan ta cuminsa prepara pa paranda di dande. Despues di tiro di aña nan tabata reuni na cas di mayornan di Bruno hunto cu e paranda ya cu ta custumber cu ta toca y canta nan dande na cas di e

cantante y despues ta sali cu e paranda cu ta dura pr lo menos 3 dia of mas.

E paranda di dande ta consisti di 5 pa 6 tocador y cantante. Na cada cas ta canta dande cuminsando cu cabez di cas te na esun mas chikito y si tin bishita nan tambe ta ser canta cu e bendicion di aña nobo.

Despues di dande ta toca un of dos pieza mas.

“Nos no tabata pasa paranda pa placa, nos tabata pasa paranda pa e tradicion y tin vez nos tabata haya algun cent preto, placa gai, sepelin, depchi y podise diez placa. No kita afo cu nos ta haya pan dushi, boyo, drikidek, etc.”, el a relata.

Bruno Koolman a cuminsa cu paranda di dande cu 14 aña di edad, y tin 70 aña ta

pasa dande, no solamente na Savaneta, pero den tur skina di Aruba.

“Nos a yega di topa cu awa cero formal cu nos mester a stop di toca un rato y finalmente bolbe cas pasobra e awa tabata cai formal. Asina cu tempo drecha nos ta bolbe sali cu paranda”, el a splica. Bruno no solamente ta homber di dande, pero gusta balia y sigur su fiesta di San Juan.

Apesar di su edad e ta core paranda di dande y su deseo ta pa sigui cu dande y e hobennan tuma e tradicion over.

Den añanan 90 Fundacion dande a reconoce Bruno cu e merito di pin di oro pa sosten na dande y diasabra dia 26 e Festival di dande ta ser dedica na Bruno Koolman y na Tico Oduber.